



SINDIKAT METALACA FEDERACIJE BOSNE I HERCEGOVINE

Obala Kulina bana 1, 71 000 SARAJEVO; Tel./Fax.: ++ 387 33 20 01 76;

E-mail: info@smfbih.ba Web: www.smfbih.ba

Broj: 01-231-XII/25

Sarajevo, 19.12.2025. godine

VLADA FEDERACIJE BOSNE I HERCEGOVINE n/r Nermin Nikšić, Premijer

Predmet: Poziv na hitno djelovanje povodom najave stečaja Nove Željezare Zenica

Poštovani Premijeru,

Obraćamo Vam se u ime sindikata i veoma zabrinutih radnika Nove Željezare Zenica, povodom informacije da je uprava ovog društva Općinskom sudu u Zenici podnijela prijedlog za pokretanje stečajnog postupka.

Imajući u vidu izuzetno ozbiljne socijalne i ekonomske posljedice koje bi eventualni stečaj mogao imati po radnike, lokalnu zajednicu i Federaciju BiH u cjelini, te metalurški sektor kao strateški, smatramo da je neophodna hitna i konkretna reakcija nadležnih vlasti na svim nivoima.

Blizu dvije hiljade radnika direktno, te nekoliko hiljada indirektno, egzistencijalno zavisi od proizvodnog procesa u zeničkoj Željezari. Stečaj bi, u najgorem scenariju, mogao ugroziti veliki broj radnih mjesta, a naglo otpuštanje radnika nosi ozbiljan rizik socijalnih potresa, protestnih okupljanja i destabilizacije čitave lokalne zajednice.

Imajmo u vidu da se samo po osnovu bruto plata radnika Željezare isplati oko 68 miliona KM godišnje. Doprinosima za penzijsko-invalidsko osiguranje radnika Željezare osiguraju se sredstva za isplatu tridesetak hiljada minimalnih penzija. Radnici u kantonalni budžet uplate i oko tri miliona KM poreza na dohodak iz svojih plata. Od ove željezare žive i mnogi koji misle da od nje ne žive. Pad ili gašenje proizvodnje doveo bi i do pada izvoza i deviznog priliva, smanjenja prihoda od doprinosa i poreza, dok bi lokalni budžeti, dobavljači i privreda ostali bez jednog od ključnih izvora prihoda, od 700 miliona do milijardu maraka godišnje. Nova Željezara Zenica jedan je od posljednjih velikih metalurških sistema u Bosni i Hercegovini. Gašenje proizvodnje čelika dugoročno bi značilo urušavanje čitave industrijske grane, gubitak metalurške baze Federacije BiH i države i kritične infrastrukture.



SAVEZ SAMOSTALNIH SINDIKATA
BOSNE I HERCEGOVINE





SINDIKAT METALACA FEDERACIJE BOSNE I HERCEGOVINE

Obala Kulina bana 1, 71 000 SARAJEVO; Tel./Fax.: ++ 387 33 20 01 76;

E-mail: info@smfbih.ba Web: www.smfbih.ba

Država bez vlastite proizvodnje čelika nije suverena država.

Na kraju, ovo nije isključivi problem Nove Željezare i njenih radnika. Posljedice bi se neminovno prelile i na radnike Koksare Lukavac, Željeznica Federacije BiH, Rudnika željezne rude Prijedor, Željeznica Republike Srpske, kao i na brojne druge subjekte u industrijskom lancu u kojem egzistenciju ostvaruje desetak hiljada ljudi.

Bez hitnog angažmana svih relevantnih faktora i osiguranja nužnih uslova za stabilan i održiv rad, Željezara će izgubiti kupce, licence i ugovore, čime bi svaka buduća reorganizacija ili sanacija postala praktično nemoguća.

S tim u vezi predlažemo da se u što kraćem roku organizuje sastanak s ciljem sagledavanja trenutnog stanja i pronalaska najboljih mogućih rješenja za radnike i fabriku, na kojem bi, pored Vas, učestvovali predstavnici uprave Nove Željezare Zenica, Koksare Lukavac, Rudnika željezne rude Prijedor, federalni ministar energije, rudarstva i industrije, federalna ministrica prometa i komunikacija, direktori relevantnih javnih preduzeća iz Federacije i Republike Srpske, kao i predstavnici Ministarstva vanjske trgovine i ekonomskih odnosa BiH (mjere zaštite domaće proizvodnje, kontrola uvoza čelika na granici i ograničenje izvoza metalnog otpada). Ovo bi mogla biti i prilika da u državi opterećenoj podjelama pokažemo da možemo i moramo zajednički raditi, za dobrobit svih.

Mi Vam stojimo na raspolaganju za svaki vid saradnje u interesu radnika, industrije i države u cjelini.

S poštovanjem,



PREDSJEDNIK, SM FBiH

Almir Salihović
Almir Salihović

Dostavljeno:

- Naslovu;
- a/a

